

Սովորութիւն է ունեցել Արովեանի պապը, նաեւ ընդհանուր հացկերոյթ տալու բոլոր միաբաններին: Վանքում երկու-երեք օր մնալուց յետոյ՝ նա տուն է վերադարձել միշտ:

Հաքստհաուզէն աւելացնում է.

«Արովեանի ծնողները այլեւս այնքան հաբուստ չէին, որ ի վիճակի լինէին այդչափ առատօրէն նուէրներ տանելու վանք: Բայց եւ այնպէս նրանք էլ տարեկան մի անգամ էջմիածին ուխտի են գնում, գոհանալով միայն ընդհանուր հացկերոյթ տալով»:

Արովեանի տոհմի, մեծ հօր եւ ծնողների մասին Հաքստհաուզէնի մօտ ցրուած տեղեկութիւնները ամփոփելուց յետոյ՝ անցնինք իր՝ Արովեանի անձնաւորութեան:

* * *

Արովեանի ուսման եւ կրթութեան մասին հետեւեալ տեղեկութիւններն է հաղորդում Հաքստհաուզէն (Ա. 209):

«Իմ բարեկամ Արովեանի ծնողները որոշել էին՝ իրենց որդուն հոգեւոր կոչման նուիրել: Տասր տարեկան հասակում կրթութեան նպատակով նրան հայրը էջմիածին է տանում եւ ներկայացնում ծերունի Ղուկաս կաթողիկոսին: Կաթողիկոսը ասում է Արովեանի հօրը. «Քո հայրը մի առաքինի մարդ էր. ես եւ իմ վանքը շատ բան ենք պարտական նրան իր բարի գործերի համար: Քո հանգուցեալ հայրը քրիստոնէական մտքի եւ գործի տիպար էր. անգամ մեր վերջին վանականը նրանից լաւ բան է տեսել: Այդ պատճառով էլ ուրախութիւն է մեզ՝ քո ընտանիքին մի փոքրիկ ծառայութիւն մատուցել՝ ընդունելով այս տղային»: Ապա կաթողիկոսը օրհնում է փոքրիկ խաչատուրին եւ ասում. «Մի՛ տխրիր, զաւակս, որ հայրդ հիմա գնալու է, որ այսուհետեւ մայրդ քեզինց հեռու պիտի լինի: Ես կը լինիմ քեզ հայր: Ե՛կ մօտս, գրկիր ինձ եւ համբուրի՛ր ձեռքս»:

Արովեան էջմիածին էր տարուել ուրեմն, հոգեւոր կոչման համար պատրաստուելու նըպատակով: Նրա էջմիածնական կեանքի մասին, երբ այնտեղ է դալիս Պարրոտ, Հաքստհաուզէն հաղորդում է մեզ նաեւ հետեւեալը.

«Պատանի հասակից Արովեանը կաթողիկոսին մօտ էր, որ հայերի աչքում սուրբի հռչակ ունի եւ աւելի յարգանք է վայելում, քան ուրիշ աշխարհիկ իշխան: Այս պատճառով ա-

հա՛ Արովեանի դիրքն էլ լաւ էր, նախանձելի: Եւ սակայն նրա հոգին ձգտում էր դէպի բարձրը: Եւ երբ նա ուղեւոր Պարրոտի հետ ծանոթացաւ, յանկարծակի, որպէս մի կայծակ փայլատակեց նրա մէջ այն միտքը, թէ կենսական պահանջ է նրա համար երոպական կրթութիւն առնելը: Ու նա վճռեց Պարրոտին ուղեկցել դէպի Եւրոպա:

Բայց ահա բարձրանում են ամէն կարգի արգելքներ, Արովեանի մերձաւորները չեն ուզում, որ նա այդչափ հեռու երկիրներ երթայ, իսկ ամենից առաջ՝ հոգեւորականութիւնը երկիւղ ունէր, որ չլինի՝ թէ նա անհաւատարմութիւն ցոյց տայ իր կրօնին:

Վերջապէս Արովեան յաղթահարեց ամէն ինչի, մանաւանդ որ Եփրեմ կաթողիկոսն էլ տուաւ իր համաձայնութիւնը: Եւ երբ Արովեան ծունկ չոքեց նրա առաջ եւ լալով երեսը ծածկեց կաթողիկոսի գրկում, այսպէս խօսեց պատկառելի ծերունին.

«Որդի՛ս, հոգեւոր զաւակս: Եթէ դու դառնաս ուրացող, մոռանաս քո մայր-եկեղեցին եւ հոգեւոր հօրդ, որ ահա ես եմ, մոռանաս ծրնողներիդ ու հայրենիքդ ու թողնես հաւատդ, ապա ուրեմն գիտցիր հաստատապէս, որ Աստուած մի կտոր չոր հացից անգամ կը զրկի քեզ: Իսկ եթէ, բան է, դու մեզինց հեռանալ ես ուզում, որովհետեւ ինքզինքդ վիրաւորուած ես զգում, ապա ուրեմն ասա՛ ինձ, ամէն ինչ կը չտկեմ: Ես քո հանդէպ ցոյց եմ տուել Տօլբիասի հայրական բարութիւնը, իսկ դու էլ ինձ համար եղել ես մի այնպիսի զաւակ, ինչպէս՝ նրանը: Բայց դու ուզում ես մեզ թողնել: Քո երիտասարդ հասակը քեզ դրան է մղում: Դու ասում ես, որ հայրենիքիդ սիրու համար ես գնում: Ուրեմն թող լինի՛ այնպէս, ինչպէս ինքդ ես ուզում: Բան է, եթէ օտար աշխարհում ցաւ ու վիշտ տեսնելու լինիս, պիտի պարտաւորուիս՝ հլութեամբ տանելու — այդ ամէնը, ոչ Աստծուն, ոչ էլ մեզ պիտի մեղադրես: Եթէ, ինչպէս ասում ես, չմոռանաս հայրենիքդ ու կրօնդ եւ վարուիս այնպէս, ինչպէս խոստանում ես, վերադարձիդ դու նորէն մեր սիրելին ես, ինչպէս որ եղել ես մինչեւ այժմ: Թերեւս դու ինձ մեռած դտնես. այն ժամանակ օրհնիր իմ գերեզմանը: Իմ աճիւնը